



Il deputà Franz Sepp Caluori e la deputada Elita Florin-Caluori.



Gist arrivads a San Murezzan cun il tren: Deputà Kenneth Danuser, deputada Gaby Thomann-Frank e cusseglier guvernativ Mario Cavigelli.

FOTOS G. N. STGIER

Success canadais cun gratulants grischuns

Il parlament grischun ha visità San Murezzan

DA GION NUTEGN STGIER / ANR

■ Ospitant da l'entira regenza grischuna e dal parlament chantunal è stà Michael Pfäffli, il president dal cussegl grond. Sco deputà da San Murezzan ed il pli aut Grischun ha el envità ses collegas e sias collegas al Super-G dals umens dad ier mesemna. Avant ubain durant ina sessiun viseta il cussegl grond magari ina interpresa pli gronda ubain pli pitschna, in'otra giada ina occurrenza culturala e sco ier per exempel in event da sport. Da preschent stat be ina occurrenza da sport en il center e quai èn ils Campiunadis mundials da skis en noss chantun. Cun avair lieu quels èn sia vischnanca ha Michael Pfäffli, il president dal cussegl grond e deputà liberaldemocrat, envità intgins dis avant la sessiun da favrer dunnas ed umens dal parlament chantunal al Super-G dals umens. Retschets èn ils giasts vegnids a San Murezzan a la staziun e per intgins dad els è quai stà l'emprima entupada en l'onn nov.

Per nus èsi ina gronda onur

Cun plaschair haja el constatà che blers deputads e deputadas hajan mussà interess per quel inscunter sportiv, ha ditg Pfäffli ier tar ses bainvegns. Sa mussà zunt cuntent è lura er Sigi Aspriun, il president da la vischnanca da San Murezzan. Per il lieu e per l'entira regiun saja quai ina gronda onur da pudair esser ospitant da

l'instanza politica chantunala, ha punctuà Aspriun. Ina uschè auta viseta politica dal Grischun en in culp n'enconuscha er San Murezzan betg. Il president communal da San Murezzan ha betg mo chattà bels plects, mabain è el er stà in fitg bun ospitant e guid. Losch da la viseta dal parlament grischun è er stà Franco Giovanoli, il directur dals Campiunadis mundials da skis 2017.

San Murezzan 2017 è la conferma

Bunas notas als Campiunadis mundials da skis, als organisaturs ed als tschients e tschients voluntaris dat er Barbara Janom Steiner, la presidenta da la regenza. Quella saja vegnida gugent en corpore a San Murezzan er per mussar la vischinanza envers tuts quels che segnan per l'organizzaziun perfetga. L'occurrenza conferma er ch'ils Grischuns sajan abels d'organisar in uschè grond event sco quel che saja da fitg gronda muntada. L'occurrenza pussibileschia er da sa mussar a l'entir mund e gist la reclama haja segir in effect positiv sin il turissem. Gist il sport da skis e d'enviern saja ina part da nossa cultura, ha ditg la cussegliera guvernativa da la pbd. Ella sco er ses quatter collegas da la regenza, inclus la gronda delegaziun da deputadas e deputads, tuts ensemen èn sa divertids er senza ina medaglia per la Svizra, persunter duas per il Canada, in pajais che ha blier communaivel cun l'Engiadin'Ota, be en dimensiuns pli grondas e cun urs e na capricorns.



Surselva ed Engiadin'Ota unidas: Deputada Silvia Casutt-Derungs e deputà Christian Hartmann.



Da buna luna: Cusseglier guvernativ Christian Rathgeb e deputà Robert Heinz.



Entupà han Margrit Darms-Landolt e Rico Lamprecht er l'anteriuer skiunz Dumeng Giovanoli (da mez).



Dus schuldads cun cussegliera Barbara Janom Steiner, ella che ha er fatg militar.



L'anteriura presidenta communal da Silvaplana e deputada Claudia Troncana cun deputà Reto Cramer.



Cun interess persequitescha la deputada Gabriela Tomaschett-Berther il Super-G dals umens.

■ FOTO DAL DI

Er quai è San Murezzan

(ant/gns) Senza u cun Campiunadis mundials da skis è San Murezzan il lieu turistic nua che blers dals giasts n'enconuschan segir betg in problem. Daners èn avant maun ed il positiv è bain che l'entira Engiadin'Ota profittescha da la societad prominente. Affars che vendan moda be da las pli enconuschantas marcas sco per exempel Armani, Boss, Bogner, Gucci, Prada ed er anc bieras autras tutgan tar San Murezzan sco il clutger tort ubain la Corviglia. Ils «rehuns», els fan lur partis en las villas ed en ils nobels clubs e quai senza far mal als blers fans che persequiteschan mintga di las cursas. Senza la vita glamurusa na fiss San Murezzan segir betg San Murezzan e betg uschè renumà sin l'entir mund.

Per San Murezzan la vita da mintga di: Pellitscha ed affar da moda da renum mundial.

FOTO G. N. STGIER

